

KIA PEHEA ANO TE MIHI ?

Ki te hunga naana nei nga korero i te Pepa o Oketopa, wharangi 2164: e whakatika atu ana ki etahi o nga kupu e kiia nei—he pungarehu kararehe—he mahi kino te tahu i te tinana. E tika ana, engari ehara i te mea e manaaki ana te iwi katoa i aua kupu, e tau ai te ki me iri ki runga i te iwi katoa te hara o aua kupu. E tika ana no Taranaki taua tamaiti. E tika ana te mohio o nga iwi hei tamaiti ia ma te Whiti, a, he tamaiti rangitira. Engari, he poauau, he whakahi. Kaore nga iwi nei i te manaaki i nga tikanga a tena tamaiti.

No te ra tuatahi aua kupu. Ka tu au i konei. Ko aku kupu raupatu tenei mo aua kupu: E nga iwi e nga rangatira-tanga o te Motu, me nga Mema. E Ngata korua ko Kooti me o korua hoa, kua tae mai nei koutou ko nga iwi ki te kawē mai i to koutou aroha ki to koutou hoa, tena koutou. Tatou i roto i te pouri kua marama. Ahakoa i tae pungarehu mai to koutou hoa ki a tatou; kua tae atinana mai i tensi ra. Ko koutou ko nga iwi te mea nui, hei aha maku taku tamaiti, i a koutou me ta koutou pani me ana tamariki. Katahi au ka mihi ki te pani. E Miria, tena koe. To mananuitanga i tera whenua ke, i te rukunga i nga tuatea o te moana to manawanui kia tae a-tinana mai koe ki waenganui i o iwi e pae nei, tena koe, me o tamariki. E Mi, kaua e whakarongo ki nga korero. Na taua i aha te ture a tera iwi; e taea e taua te aha, tena koe me nga iwi. No te ra tuatahi enei kupu, no te paraire.

I te rahoroi ka tu etahi me te Kapinga. Ko taua rangi he ra poto. Ko te take mo nga mahi i whakahaua e Ngata, mo nga poi, mo nga karakia kia whai taima ai aua mahi. No reira tokohia ake i tu atu ki te mihi. Kaati, e nga korero kaore nei ona ariki: he tokomaha tonu o Taranaki nei i tu atu ki te mihi, engari kaore i kaha ki te mihi wehewehe i te kore kaore i mohio no hea etahi, ko wai ma ranei o ratou ingoa. Heoi ano i katoatia te karanga: E nga iwi o te Motu, kei mahue tetahi ki waho. Kia pehea te mihi ki a Ngata? I te kino o nga korero o te Pepa o te Oketopa nei, te kaha hoki te hunga naana aua korero ki te whakaatu ko wai ia, ratou ranei. He korero kino hoki, he hanahani, he amuamu. I mahara ahau ki nga iwi whakapono ki te Atua, e mahi mai nei, e tu mai nei, e manamanahau mai nei i te aroaro o te Pihopa o Aotearoa e kore e hari i enei tu korero. Kaore ia he iwi amuamu. Ina te kupu a nga Etita o te Toa, “Kaore te Toa e whai waahi ki nga whiu kupu taikaha a te tangata.”

Kapua Rangataua Keepa.

Purangi.